

– Դուք վկայեցեք, վարպետ, թե ինչպե՞ս են իմ աշակերտները, ամբողջ քաղաքում նրանց հատը կա՞յ:

– Ի հարկե, չկա... – պատասխանեց վարպետը ծաղրական եղանակով: – Այսպիսի աշակերտներ միայն դուք կարող էք կրթել:

Պատռելին նրա խօսքերը ճշմարտի տեղ ընդունեց:

Մենք հեռացանք Սիմոն պատռելիի դպրոցից, տանելով մեզ հետ խիստ տխուր զգացմունքներ:

Տեր Թողիկի դպրոցում հազար ու մեկ խստութիւններ, հազար ու մեկ կանոններ կային, բայց այդ բանը չկար, որ աշակերտների բերանը չափելով իմանային, թե արդեօք նրանք դրսում խօսո՞ւմ են, թե ոչ:

Երբ դուրս եկանք փողոցը, վարպետ Փանոսը ասաց Ասլանին:

– Եթե գիտենայիք, թե որքա՞ն աշխատել եմ, որքա՞ն չարչարուել եմ ես, որ մի կերպով այդ անպիտանին հեռացնեմ այդ դպրոցից, բայց հնար չի եղել:

– Ինչո՞ւ, – հարցրեց Ասլանը:

– Նա մի քանի հզօր պաշտպաններ ունի, ինչպէս նահանգապետ փաշան եւ սրբազան առաջնորդը:

– Այդ գարշելի արարածի մեջ ի՞նչ են գտել, որ պաշտպանում են նրան:

– Հենց այն, որ նա գարշելի է: Չէք կարող երեւակայել մի մարդ, որ դրա չափ բարոյապէս փչացած եւ կեղտոտ լինէր: Կատարեալ եղեռնագործ է այդ անպիտանը: Նրան խեղդել պէտք է, եւ անելի ոչինչ: Գիտե՞ք, շատ երեկոներ նա ընտրում է իր աշակերտներից մի քանիսը եւ տանում է փաշայի մօտ. այնտեղ մնում են ամբողջ գիշերը, երգում են, պար են գալիս եւ զոարճացնում են փաշային...

– Լաւ՛ բարոյականութիւն կսովորեն... – ասաց Ասլանը խորին զգուշութեամբ:

– Փաշան առաջ չգիտեր, թե հայոց մանուկները քաղցր ձայն ունեն եւ լաւ տաղեր, երգել գիտեն. մի գիշեր նա հիւր է լինում նորին սրբազնութեան մօտ, տեսնում է այնտեղ մի խումբ մանկահասակ երգիչներ. շատ հաճելի են թուում նրան երգիչները, եւ երբ նորին սրբազնութիւնը նկատում է այդ, պատողիրում է Սիմոն պատռելիին, որ ամէն անգամ, երբ փաշան պահանջելու լինի, նա իր աշակերտներից ամենալաւ երգիչները տանէ նրա մօտ:

– Բայց ինչպե՞ս են համբերում ծնողները: